

# Inatsisartut peqqussutaat Radiomik TV-millu ingerlatsineq pillugu Inatsisartut peqqussutaata allanngortinnera pillugu Inatsisartut peqqussutaat (Radio tv-lu pillugit ataatsimiititaliat atorunnaarsinnerat)

## § 1

Inatsisartut peqqussutaanni nr. 6 ulloq 14. november 2004-meersumi radio-mik tv-millu i-ngerlatsinermut tunngasumi, Inatsisartut peqqussutaat nr. 4 ulloq 1. juni 2006-imeersukkut allanngortinneqarsimasumi, allannguutissat makku suliarineqarput:

1. Peqqussummi tamakkiisumi ima allaqqasut "Radio tv-lu pillugit aalajangiisartut" tamarmik ima allaqqalissapput "Naalakkersuisut".
2. § 19, *imm.* 3-mi peerpoq "Radio tv-lu pillugit aalajangiisartut inassuteqarneratigut".
3. § 28, *imm.* 5, 1. *pkt.-imi*, peerpoq "aamma Radio tv-lu pillugit aalajangiisartunut, takuuk kapitel 6,".
4. § 19-*ip* kingornanut ilanngutissaaq:

"§ 19a. KNR-ip aamma radioqarfiit tv-qarfiillu allat radio-kkut tv-kkullu aallakaatitsisarnermut tunngatillugu maleruagassanik malinninnersut Naalakkersuisut nakkutigissavaat. Inatsisartut peqqussutaannik unioqqutitsinerusinnaanerit Naalakkersuisut uparuaassutigissavaat, inatsisartut peqqussutaat naapertorlugit aalajangersakkat akuersissutinullu atugassarititaasut aallaavigalugit." *Imm.* 2. Naalakkersuisut nakkutilliinissaminut atugassaminik KNR aamma aallakaatitsisinnaanermik akuersissummik pigisaqartoq suliffeqarfiup ingerlatsinera pillugu paasissutissanik piumaffigisinnaavai."

5. § 42, *imm.* 2, atorunnaarpoq "Radio tv-lu pillugit aalajangiisartut imaluunniit".
6. *Kapitel 6*, §§ 43-49, atorunnaarput, aamma § 10-*mi*, *imm.* 1-*imi* "atorunnaarpoq", tak. kapitel 6,".
7. § 55-*ip* kingornanut ilanngutissaaq:

"§ 55a. Naalakkersuisut makkunatigut aalajangiissapput:

- 1) Ussassarutit suunerat, sumut tunngasuunerat, oqaatsit atugaanerat aamma annertussusaat, tak. §§ 50-51 aamma § 53.
- 2) Radiokkut tv-kkullu ussassarutit imarisaat, tak. §§ 52. Naalakkersuisut aalajangersakkanik unioqqutitsinerit uparuaassuteqarfigisinnaavaat, aamma KNR imaluunniit aallakaatitsinissamut akuersissummik pigisaqartoq aalajangiinermik avammut saqqummiussinissaannik pisussaaffilersinnaavaat. Naalakkersuisut aalajangersinnaavaat tamanna qanoq periaaseqartumik qanorlu iluseqartumik pissasoq.
- 3) Ussassarutini aallakaatinneqartuni paasissutissat piviusut pillugit akissuteqarnerit.

Akissuteqarsinnaatitaanermi piumasarineqarpoq paasissutissat piukkunnassuseqassasut aningaasatigut allatigulluunniit annaasaqaataasinnaanermut, taakkulu ilumoortuunerat qularnassuseqassanngitsoq. Naalakkersuisut piumaffigisinnaavaat KNR imaluunniit aallakaatitsinermut akuersissummik pigisaqartoq akissuteqaammik avammut saqqummiussinissaannik. Paasissutissamut akissuteqaatip qanoq imaqaarnissaa, qanoq isikkoqaarnissaa sumullu inissinnissaa Naalakkersuisut aalajangersinnaavaat.

4) Aallakaatitat aningaasaliiffineqarsimasut suunerannik kikkullu aningaasaliisuunerannik ilisimatinneqarneq, tak. §§ 54-55.”

8. § 56, imm. 1, atorunnaarpoq”, tak. § 46.”.

9. § 59-imi, imm. 1, nr. 5-imi, allanngortinneqassaaq ”§ 46, imm. 1, nr.1 imaalillugu ”§ 55a, nr. 1”, aamma § 59-imi, imm. 1, nr. 6-imi, allanngortinneqassaaq ”§ 46, imm. 1, nr. 2” imaalillugu ”§ 55a, nr. 2”.

10. § 59-imi imm. 1, nr. 7-mi peerneqassaaq § 48.”.

11. § 60, imm. 3, 2. pkt., aamma § 64, atorunnaarput.

12. Inatsisartut peqqussutaanni tamakkiisumi allaqqasut ”Landsstyret” tamarmik imaalillugit allanneqalissapput ”Naalakkersuisut” aamma ”Landstinget” allanneqalissapput ”Inatsisartut”.

13. § 34-mi, § 37-mi, imm. 1-imi kiisalu, § 38-mi, imm. 1, nr. 2 aamma 3, allaqqasut ”Namminersornerullutik Oqartussat” allanngortinneqassapput ima allaqqalissallutik ”Namminersorlutik Oqartussat”.

## § 2

Inatsisartut peqqussutaat ulloq 1. juli 2010 atuutilissaaq.

Imm. 2. Maalaarutit qinnuteqaatillu Radio tv-lu pillugit aalajangiisartunut ulloq 1. juli 2010 sioqqullugu tunniunneqarsimasut Naalakkersuisunit inaarlugit suliarineqassapput. Aammattaaq suliassat allat inatsisissap piffissami atuutilernerata nalaani Radio tv-lu pillugit aalajangiisartunit suliarineqartut Naalakkersuisunit naammassineqassapput.

*Namminersorlutik Oqartussat, ulloq, 19. maj 2010*

Kuupik Kleist

/

Mimi Karlsen

**Namminersorlutik Oqartussat**

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit  
Namminersorlutik Oqartussat inatsisinut toqqorsiviat  
Naalakkersuisut